

IMIBONO YA WILLIAM BRANHAM

 Letheyiphu yentelwa uMbuso waNkulunkulu, njengoba ngiyetfula kuMnaketfu Lee Vayle kutsi ibe yincwadzi lelibhuku lengakahlungwa. UMnaketfu Vayle ungcicelile, lapha phambi kwakhe uMnaketfu Mercier, ku—kuniketa leminye yalemibono yakucala. Kusobala, imibono lapho wawu... Ngi...i fir...Lenye yetintfo tekucala lengingayikhumbula, yimibono, ifika. Imibono ifika ngaso sonkhe sikhatsi. Kodvwa emvakwekuphendvuka kwami ngulapho la ngicabanga kutsi waba nelisasasa khona, Mnaketfu Vayle.

² Yebo-ke, ngiyakhumbula, emvakwekuba sengigcotjiwe ebandleni, libandla lemaBaptisti, nguDr. Roy Davis, lapha eSitaladini iWatt eJeffersonville, lapho libandla lalikhona ngalesosikhatsi. Ngiyawukhumbula umbono munye logcamile, kungakabi ngetulu kwemaviki lambalwa emvakwekwami...cishe i...Ngingatsi, etinsukwini letimbala emvakwekugcotjwa kwami. Ngangi...ngabona umbono wendvodza lendzala leyayilele esibhedlela, leyayifihlitekile. Yayiyindvodza lelikhalatsi. Futsi yaphiliswa ngaso lesosikhatsi, ngangekutsi, kwabangela lokunengi kakhulu kudideka. Futsi yasukuma yaphuma embhedzeni yase iyesuka iyahamba.

³ Futsi tinsuku letimbili, cishe tinsuku letimbili, emvakwaloko, ngangivala tinsita, yetinsita letatingakabhadalelw eNew Albany, emanti, negesi, ne—netikweneti tagezi. Futsi ku...Ngagcwala kakhulu injabulo! Ngaso sonkhe sikhatsi uma ngitfolo indlu lendzala, ngangivele nje ngingene bese ngiyakhuleka, niyati, lapho kwakungahlali muntfu khona.

⁴ Futsi ngiyakhumbula ngicocela uMnumz. Johnny Potts, losaphila namuhla. Usondzele impela, ngiyacabanga, eminyakeni lengemashumi lasikhombisa nomu lengemashumi lasiphohlongo budzala. Bekangumfundzi wemamitha lomdzala. Futsi bese bamsusile ekufundzeni emamitha ngalesosikhatsi, futsi bambeka edeskini, kutsi atsatse tikhalo netintfo, uma ungena emnyango, netincingo tekubitelwa emsebentini. Futsi ngangimcocela ngaloko iNkhosi leyayingibonise kona. Futsi bekakadze, kanye ngesikhatsi, afundza emamitha lafihlakele lolohlala awafundza langakawatfoli. Futsi kuloku, bebekacoca, indvodza...

⁵ Lokukutsi, ngangibonile ephepheni, lapho bebabakadze banencola lendzala... Ngaletotinsuku, bashayela emahhashi lamabili, futsi babutsa tibi nemfucuta, emahontjini. Kwakunendvodza lendzala lelikhalatsi ligama layo kunguMnumz. Edward J. Merrell. Bekahlala eSitaladini

iClark lesi theni-handred-endi-thwenti eNew Albany. Futsi bekakadze ashayiswe belungu lababili, lokwakuyintfombatane ne—nemfana, bagibele imoto. Futsi lomfana bekehlulekile kuyibamba lemoto, futsi yamfihlitela esondvweni lencola. Futsi nje yamephula onkhe ematsambo emtimbeni wakhe, cishe, futsi tachacha sifuba sakhe sehlukana ekhatsi, ikakhulukati. Kwashayeka umgogodla wakhe wakhwesha endzaweni. Futsi bamyisa esibhedlela, sekakabi kakhulu.

⁶ Futsi uMnumz. Potts, endlula e—esibhedlela lapho eNew Albany, bekamcocele loko mayelana neNkhosi iseBenta ngami. Futsi watfumela kutsi ngite, ngimkhulekele. Futsi masinyane, ngacabanga, “Ngiyo leyondvodza lengiyibone kulombono.”

⁷ Ngako, nga—ngangesaba kancane kutsi ngihambe, ngoba lowo kwakungulomunye weyami yekucala, niyabona, kutsi ngihambe kanjalo. Ngako, kodvwa, noko, ngahamba ngase ngitsatsa bhululu wami, lobekasandza kuperhendvuka nje, umfana lomncane longumFrench lotsiwa nguGeorge DeArk. Futsi ngangisanza kumholela kuKhristu nje. Futsi senyuka. Ngase ngitsi, “Manje, Mnaketfu George, ngi—ngi—ngifuna ukhumbule. Letintfo leti letenteka kimi, angiticondzi. Kodvwa, ukhumbule, lendvodza itophiliswa. Futsi uma seyiphilisiwe, kukhona i...Angikhoni kuyikhulekela kute kufike belungu lababili futsi eme ngakulolunye luhlangotsi lwembhedze, ngoba ngifanele ngikwente ngendlela lengakukhonjiska ngayo.”

⁸ Futsi ngangena e—esibhedlela futsi ngacela uMnumz. Merrell. Futsi ngaya lapho, nemkakhe wangitjela kutsi bekumatima kakhulu. Futsi bekangakwati kunyakata ngenca yemshini we x-reyi wawubonakalise kutsi lamanye alamatsambo bekahleli ngco edvute neliphaphu. Futsi uma bekanyakatile, ngani, kwakutovle, kungahle kubhobose emaphaphu akhe futsi kumophise aze afe. Futsi bekakabi kakhulu. Futsi kwakopha kancane emphinjeni wakhe, nakanjalonjalo, ngoba bekopha ngasemlonyeni wakhe. Kwase kucishe kube tinsuku letimbili alele lapho. Nendvodza yayi, ngalesosikhatsi, cishe ineminyaka lengemashumi lasitfupha nesihlanu budzala, ngiyetsema, emashumi lasitfupha noma emashumi lasitfupha nesihlanu. Indvodza leseyikhulile; emadzevu ayo, lamadze, besagucuke amhlophe. Netinwele tayo tatimpunga.

⁹ Futsi ngangena ngase ngitjela lendvodza, nomakunjalo, lomboño lengangiwubonile uvela enKhosini. Nebantu labasha bayangena, lebebamshayisile. Ngase ngiguca phansi kutsi ngimkhulekele. Futsi khona masinyane nje, lendvodza yamemeta kakhulu, itsi, “Sengiphilisiwe,” futsi yagcuma yaya etulu. Nemkayo, etama kuyibamba ayibuyisele emuva, embhedzeni. Nalomunye wabogadzi weta, etama kuyibamba embhedzeni. Futsi yagcuma yaphuma embhedzeni, yabangela

lokunengi kakhulu kujabula lokwecile. Futsi ngesikhatsi ngiya e... Ngatsi kuMnaketfu George...

¹⁰ Kwase kutsi-ke lomunye wabodzadze, kwakusibheddlela semaKhatolika, uyangena wase utsi ngitodzingeka ngiphume lapho, ngenca yekwenta leyondvodza ijabule ngalokwecile. Ngoba, yayinekushisa kakhulu, cishe lokulikhulu nakune. Futsi intfo lengakajwayeleki, ngesikhatsi bayibuyisela ekhatsi; u-umphristi, indzawo, nalabanye bodokotela lebebabayibeke kuyo, bayenta yabuyela embhedzeni, ngoba yayigcoka timphahla tayo. Futsi ngesikhatsi bekala lizinga layo lekushisa, yayingasashisi.

¹¹ Manje, banengi bantu labaphilako namuhla, lababone lombono, bawubona wenteka, noma labatiko ngawo.

¹² Futsi ngaphuma ngema etitebhisi, futsi ngatsi kuMnaketfu George, “Manje, bukisisa. Itobe igcoke libhantji lelinsundvu nesigcoko lesinesigadlana. Itohamba yehle ngco ngaletitebhisi leti, emizuzwini lembalwa.” Futsi nembara yakwenta vele. Iphuma ngco futsi yahamba yehla.

¹³ Futsi cishe e—e—ebusuku emvakwaloko, iNkhosi yabonakala kimi futsi, ngalokunye kusa, sekutokusa nje, futsi yangikhombisa wesifazane lobekakhubateke kabi kakhulu, lobekatophiliswa. Ngako ngatsi, “Yebo-ke, mhlawumbe ngito—ngitotfola nje kutsi ukuphi.”

¹⁴ Futsi ngako ngehla futsi ngangivala lamanye emanti, etikwe, ngikholwa kutsi kwakukukhona, ngaseSitaladini iEighth eNew Albany. Futsi ngangine...Bekuyindlu lehlukaniswe kabilis, futsi ngangesaba kutsi ngangivale totimbili tinhlangotsi. Lolunye luhlangotsi, bantu bese baphumile; nakulololunye luhlangotsi, bantu bebakhona. Ngako ngahamba ngaya ngakulololunye luhlangotsi lobelu—lunebantu, luyasetjentiswa. Futsi nganconcotsa emnyango. Futsi bebabantu la—la—labahlupheka mbamba. Nalekhangako impela, intfombi ita emnyango, itsite nje kugcokisa kwesihlupheki. Futsi ya—yatsi, “Bewufunani?”

Ngatsi, “Ungawatama emanti, ubone kutsi avalekile yini?”

¹⁵ Futsi yatsi, “Yebo, mnumzane.” Yase iyahamba. Yatsi, “Cha. Emanti asekhone.”

Ngatsi, “Ngiyabonga.”

¹⁶ Nenina, alele embhedzeni, ligama lakhe kwakunguNkkt. Mary Der Ohanian. Futsi bekawelibandla laka-Arminius. Umfana wakhe bekadlala emuva, ngikholwa kutsi kwakunjalo, endzaweni yaseNew Albany, licembu lebhola yetinyawo. Futsi yena, indvodzakati yakhe, yayisesikolweni lesiphakeme. Ligama layo kwakunguDorothy. Futsi yatsi...Dorothy utsi kimi, “Awusuye yini lowomuntfu waNkulunkulu lobekanaloko kuphilisa lapha esibheddlela, ngalelinye lilanga na? Make wami ufisa kukhuluma nawe.” Ngase ngiyangena.

¹⁷ Futsi wangitjela kutsi bekalele, akhubatekile. Futsi bekakadze akhubatekile, embhedzeni, iminyaka lelishumi nesikhombisa, kusukela kwatalwa lentfombatane. Futsi ngako lentfombatane yayineminyaka lelishumi nesikhombisa budzala. Futsi ngako ngamtjela ngaloko... Watsi, “Ngabe nguwe lomuntfu waNkulunkulu lowaphilisa lowamuntfu na?”

¹⁸ Ngatsi, “Cha, mem. Angisuye umphilisi. Ngivele nje—nje ngikhulekele u—umuntfu logulako, futsi ngaboniswa yiNtfo letsite leyangitjela.” Ngangingati kutsi bengingakubita ngekutsi yini; umbono, nomayini. Ngangingati kutsi kwakuyini, noko. Ngangisengumfana nje, futsi ngiyimpohlo nayo yonkhe intfo. Futsi ngako kwakune... Lo—lodzadze waticelela umkhuleko, kimi. Ngase ngiyamtjela, “Ake ngikhuleke, kucala, futsi kutsi-ke uma iNkhosi ingibonise kutsi ngibuye.”

¹⁹ Kwase kutsi ngesikhatsi ngiphuma ngiyokhuleka... Ngatfola uMnaketfu George. Ngaphindze ngatsi, “Lowo ngulowo wesifazane lebengi—ngikutjela kutsi bengikhuleka ngaye. Ngiyati kutsi nguye lowo wesifazane. Hamba nami.”

²⁰ Futsi sakuphukela lapho ku—kuyokwenta umkhuleko. Futsi ngako lentfombatane lencane leneminyaka lelishumi nesikhombisa budzala, kusobala, mine ngisengumfana lomncane. Futsi yayinemnakabo, cishe lonesitfupha, iminyaka lesiphohlongo budzala, intfo lefana naleyo. Futsi kwakunesihlahla saKhisimusi, kwakusemvakwaKhisimusi nje, sime endlini. Futsi bebasemvakwalesihlahla saKhisimusi, kutsi bangihleke. “Kusindzisa unina.” Ngamtjela kutsi Nkulunkulu bekatomphilisa. Futsi ngi... UMnaketfu George nami saguca kutsi sikhuleke.

²¹ Futsi ngesikhatsi ngicala kukhuleka, yebo-ke, leyoNgelosi lengiyibonako, Leyo leniyibona esitfombeni, ngaYibona ilengela etukwalombhedze. Yebo-ke, ngeluleka ngase ngimbamba ngesandla sakhe. Ngatsi, “Nkkt. Ohanian.” Manje, uhlala eNew Albany njengamanje, yena nemyeni wakhe, umndeni. Futsi ngatsi, “Nkkt. Ohanian. INKhosi Jesu ingitfumile, futsi yangitjela ngaphambi kwekuta, loko, kutsi ngikukhulekele, futsi ‘bewutolulanyiswa.’ Sukuma ume ngetinyawo takho, futsi ululame, eGameni laJesu.” Imilente yakhe yayidvonseleke ngaphansi kwakhe. Yena, neliBhayibheli lakhe la-Arminius alibeke enhlitiyweni yakhe, wacala kuya ngakulunye luhlangotsi lwembhedze. Futsi ngesikhatsi akwenta, u... .

²² Sathane wase ukhuluma nami, watsi, “Myekele nje awele lapho esiyilweni, utokwephuka intsamo yakhe, esuka kulowombhedze lophakeme.” Ngesaba kwesikhashana.

²³ Futsi ngangati njalo kutsi iyini leyomibono, ngangingati kutsi wawuyini ngalesikhatsi, kutsi leyayingitjela kona kwakuhlala njalo kucinisile. Ngako ngachubeka, nomakanjani, ngammededa wehla embhedzeni. NaNkulunkulu angufakazi

wami, watsi nje angacala, wagcuma esuka kulowombhedze, yomibili imilente yacondza. Indvodzakati yakhe yamemeta kakhulu, idvonsa tinwele tayo, igijima iyongena esitaladini, imemeta kakhulu ngemandla ayo onkhe. Bomakhelwane beta bavela ndzawo tonkhe. Futsi bekalapho, kwekucala iminyaka lelishumi nesikhombisa, ahambahamba kulelokamelo, advumisa Nkulunkulu. Ngahamba, masinyane, kutsi ngisuke kuko.

²⁴ Kamuva, ngajwayelana nalentfombatane, futsi ngahambisana nayo. Kusobala, loku akukafaneli kube serekhodini, kodvwa ngahambisana nayo lentfombi lencane.

²⁵ Akubanga sikhatsi lesidze emvakwaloko, emaviki lambalwa, ngangisendlini yamake wami, ngalenye intsambama. Futsi ngangikadze ngikhuleka, ngalolosuku, futsi nga—ngangingabonakali nje ngiphumelela, eku—eku—ekuncobeni emkhulekweni wami. Futsi ngacabanga, ngitovele nje ngihlale bonkhe...niyati, ngachubeka ngaya embhedzeni. Ngangisahlala ekhaya, ngalesosikhatsi. Futsi ngako ngahamba ngayongena e—ekamelweni, ku—kuyokhuleka. Futsi nga... kwakutsi akube yinsimbi yekucala nco ekuseni, ngiyacabanga. Futsi nga—ngakhuleka.

²⁶ Futsi, khona masinyane, ngabuka. Futsi, make, bekavamise kutsatsa timphahla takhe, avele nje atilakanyise esitulweni, niyati. Sasibantu labahlupheka mbamba. Ngaphindze ngabuka, Intfo letsite lemhophe ita kimi, futsi ngangicabanga kutsi ngangibuka lesositulo setimphahla. Kodvwa kwakunguleyoNgelosi yeNkhosi, lelo—leloLifu, niyati. Futsi Kweta ngalapho ngangikhona.

²⁷ Futsi nga—futsi ngangime ekamelweni, lencane, lesiyibita nge “shotgani” indlu, lencane, indlu lecondzile, inemakamelo lamabili kuyo. Futsi yayilayinwe ngalokubovu etulu lapha kwelubondza, niyabona. Kwakukhona umbhedze lomncane wetinsimbi ngesekudla sami. Kwakukhona wesifazane lonenhloko lemnyama eme abhekene ne...Likamelo linye laliphumele ngasekhishini. Bekeme abhekene nalowomnyango wasekhishini, akhala. Kwakunababe lobekeme kimi, futsi bekangiletsele luswane, kutsi kwakukhona intfo letsite leyayikadze isesifubeni sayo lesincane. Futsi munye, umlente walo wangesencele, wawusongene yonkhe indzawo, ngangekutsi wawubukeke etulu unamatsele emtimbeni walo lomncane. Nemlente wangesekudla, uphicene ngekuphambana. Yomibili imikhono isongene, nayo, inamatsele emtimbeni walo. Nemtimba wayo lomncane wawushwilekile futsi ugocene wate wafika lapha impela entsanyeni yayo. Futsi ngamangala, “Kusho kutsini loku na?” Futsi ngabuka, lohleti phansi ngesencele sami, futsi nako kuhleti wesifazane losamdzala, akhumula tibuko takhe, futsi atesula tinyembeti noma intfo letsite etibukwени takhe. Ngesekudla sami, embhedzeni logocwako lobovu,

lowawufanana nesitulo, kuhleti umfana lomncane lonenhloko lemhloshana lenetinwele letiphotsene, abuka ngephandle ngelifasitelo.

²⁸ Futsi ngabuka, lobekeme ngale ngetulu kwesekudla sami, futsi nako kume ekhatsi...leyoNgelosi yeNkhosi. Futsi Yatsi kimi, “Lungaphila yini loluswane na?”

Futsi ngatsi, “Mnumzane, angati.”

Yatsi, “Beka tandla takho etikwalo. Lutophila.”

²⁹ Futsi nga—ngakwenta. Neluswane lwalugcume lwehla, lusuka e...luphuma emikhonweni yeiyise. Nalolomncane, umlente wangesekudla weluleka, neluhlangotsi lwangesekudla nalolunye luhlangotsi lweluleka. Lwaphindza lwanyatsela, nalolunye luhlangotsi lweluleka. Lwaphindza lwanyatsela, nalolunye luhlangotsi luyeluleka, umtimba, incenye lesekhatsi nendzawo yeluleka. Futsi lwabeka tandla talo letincane kutami, lwase lutsi, “Mnaketfu Branham, sengiphile saka.” Loluswane loluncane lwalugcoke i-ovaloli leyi-khodro leluhlata sasibhakabbaka, noma i-ovaloli, i-ovaloli lencane lenebibhi. Futsi yayinetinwele letinsundvu, nalomncane, lomncanyana, umlomo lomncane.

³⁰ Yase-ke iNgelosi yeNkhosi ingitjela kutsi Yayingiyisa kulenyе indzawo. Futsi ngatfwalwa ngayiswa khashane. Futsi Yangihlalisa phansi ngasemathuneni lamadzala, futsi yangibonisa tinombolo etjeni lelithuna, edvute nelisontfo. Futsi Yatsi, “Lena kutoba yindzawo yakho yekulayelwa.”

³¹ Yangitfwala yayongifaka kulenyе indzawo. Futsi kwakukhona i...kwakubukeka kwangatsi kwakukadze kulidolobhana, cishe linetitolo letimbili kulo. Nasinye sasinelingembili lelimtfubi, emapulango lamtfubi emabondzeni. Futsi ngenyukela lapho, noma ngema lapho. Futsi kwakukhona indvodza lendzala iphuma, yembetse ijakhethi leyikhodro leluhlata-sasibhakabbaka, noma ijakhethi yejini leluhlata-sasibhakabbaka ne-ovaloli leluhlata-sasibhakabbaka, nelikepsi lekhodro lelimtfubi. Yayinalamakhulu, emadzevu lamhlophe.

Yatsi, “Itokukhombisa indlela.”

³² Futsi ngesikhatsi lesilandzelako sekusile kimi kuko, lengakubona ngangihamba ngiyongena ekamelweni, ngilandzela intfombi letse kuba sidudla. Futsi lapho ngingena emnyango, titfombe ephepheni elubondzeni tatibovu. Etulu ngetulu kwemnyango kwakunesayini, “Nkulunkulu busisa likhaya letfu.” Kunalomkhulu, lomdzala, umbhedze wephosta yelitfusi ungasesekudla sami. Nesitofu setinkhuni sihleti ngesencele. Futsi ngale ekoneni, kwakulele intfombatane letsii ayicishe ibe neminyaka lelishumi nesihlanu budzala. Futsi yayikadze inavendle noma lokutsite, lokwakudvонse umlente wayo wangesekudla wenyuka. Nelunyawo lwayo lwagucuka

Iwabheka eceleni, futsi lwaludvonseleke ngaphansi kwayo. Futsi i—futsi ibukeka njengemfana. Kuphela, yayinetinwele letinjengetentfombatane, futsi yayine—netindzebe letimisise kwenhlitiyo njengentfombatane.

Futsi Yatsi kimi, “Leyontfombatane ingahamba na?”

Futsi ngatsi, “Mnumzane, angati.”

³³ Yatsi, “Hamba ubeke tandla takho esiswini sayo.” Ngase ngicabanga kutsi kwakungumfana, impela sibili, ngoba Yona itsi angibeke tandla tami esiswini sayo. Ngenta njengoba Yangitjela.

³⁴ Futsi ngeva umuntu atsi, “Ayidvunyiswe iNkholosi.” Futsi ngabuka etulu. Futsi ngesikhatsi ngenta, lentfombatane yayisukuma. Futsi ngesikhatsi isukuma, emaphijama leyayiwagcokile, umlente wayo wephijama uyenyuka, futsi kwakhombisa ngasedvolweni njengelidvolo lentfombatane futsi lingesiwo emafindvofindvo, niyati, njengelidvolo lemfana. Futsi ngati kutsi kwakuyintfombatane. Futsi yayigcoke emaphijama ayo. Futsi iyefika, ita kimi, ikama tinwele tayo. Inetinwele letimhloshana, ikama tinwele tayo.

³⁵ Lentfombatane ihlala eSalem, namuhla, ishadile, futsi inebantfwana labatsatfu noma labane. Nenina neyise baselapho, nabo.

³⁶ Futsi ngako sekusile kimi—kimi—kimi. Futsi ngangiva lomunye umuntu atsi, “Mnaketfu Branham...” Noma, “Mnaketfu Bill! O, Mnaketfu Bill!” Namake wami bekangibita. Futsi ngacabanga. Ngitawuva munye, ngendlela yinye nje. Ngiphuma kulowombono, niyati, ngitsite kuceka emadvolo. Ngase ngitsi, “Ufunani, make?” Ekamelweni lelilandzelako, lapho bekalele khona.

Futsi watsi, “Kukhona umuntu lonconcotsa emnyango wakho.”

³⁷ Futsi ngakuva, “Mnaketfu Bill!” Futsi ngavula umnyango. Kwabakhona indvodza lengenako. Ligama layo kwakunguJohn Emil. Uhlala eMiami, eFlorida, manje. Futsi watsi, “Mnaketfu Bill, awusangikhumbuli.”

Ngatsi, “Cha. Angikholwa kutsi ngisakukhumbula.”

³⁸ Watsi, “Wangibhabhatisa kanye nemndeni wami. Kodvwa,” watsi, “Ngatsatsa indlela lengakalungi.” Watsi, “Ngabulala umuntu, lapha esikhatsini lesitsite lesingesidze lesendlulile. Ngamshaya ngesibhakela, futsi ngamephula intsamo, silwa.” Watsi, “Ngishonelwe ngulomunye webafana bami labancane, lomdzala kunabo bonkhe.” Futsi watsi, “Lomncane kunabo bonkhe ulele ekhaya, uyafa manje.” Futsi watsi, “Dokotela welidolobha lapha usandza kusuka nje, futsi watsi, ‘Lomntfwana unenyumoniya lephindziwe.’ Futsi nje kulukhuni kabi kutsi aphefumule.” Futsi watsi, “Ngi—ngi—ngi—ngivele nje... Ufika enhlitiywensi yami. Futsi angati noma bewungeta

yini ube nemkhuleko kanye naye.” Futsi watsi, “Manje, njengoba wati, ngingumzala waGraham Snelling.” Lokukutsi, Graham Snelling, uMfund. Graham Snelling manje, bekangakabi ngumfundisi ngalesosikhatsi; umfana longumKhristu lonemoya lomuhle. Watsi, “Ungumzala wami. Ngiyehla ngiyomlandza.” Lohlala cishe likhilomitha ukusuka kimi, entasi edolobheni. Futsi watsi, “Ngiyehla ngiyolandza yena. Futsi wena ungenyuka na?”

Ngatsi, “Yebo, Mnumz. Emil, masinyane uma sengigcoker timphahla tami.”

Futsi ngako watsi, “Ngitotsatsa imoto yami, bese ngiyakutsatsa senyuke.”

Ngatsi, “Kulungile.”

³⁹ Watsi, “Masinyane nje uma sengitfole Graham. Futsi ngifuna nonkhe nikhulekele loluswane.”

Ngatsi, “Kulungile.”

⁴⁰ Ngako-ke ngase ngiyahamba ngiyolungiselela. Nomake watsi, “Bekwentenjani na?”

Ngatsi, “Kukhona luswane loluncane lolutophiliswa.”

Futsi ngako watsi, “Luphiliswe?”

Futsi ngatsi, “Yebo, make.”

Futsi ngako ngatsi, “Ngitokutjela lokunengi ngako uma sengibuya.”

⁴¹ Ngako emizuzwaneni lembalwa, wanconcotsa emnyango, neMnaketfu Graham bekanaye. Sasenyuka lapha, ngaloko lesikwati njenge libala lekwakhela imikhumbi manje, lokwakuyiHoward Shipyard lendzala ngalesosikhatsi. Ngatsi, “Mnumz. Emil, uya . . . Sewuhlalaphi manje?”

Watsi, “Ngetulu kwase-Utica.”

⁴² Ngatsi, “Uhlala kulencane, indlu lesiyibita nge ‘shotgun’, emakamelo lamabili lamancane.”

“Yebo, mnumzane.”

“Isegcumeni.”

“Yebo, mnumzane,” washo.

⁴³ Ngatsi, “Lipulango lakho—lakho lelitungeleta likamelo phansi lapha lentiwe ngemisele lesalulwimi, futsi lipendwe ngalokubovu.”

Watsi, “Kunjalo.”

⁴⁴ Ngatsi, “Luswane loluncane lulele embhedzeni wephosta leyinsimbi. Futsi inalo endlini, lokungenani, libhuluko le-ovaloli yekhodro leluhlata-sasibhakabhaka.”

Utsi, “Iligcokile.”

⁴⁵ Futsi ngatsi, “Naloluswane lungumfo lomncanyana, cishe luneminyaka lemitsatfu budzala. Kantsi futsi lunemlomo lomncanyana, tindzebe letincanyana. Futsi lunetinwele letinsundvu ngalokuphaphatsekile.”

Watsi, “Lelo liciniso.”

⁴⁶ Ngatsi, “Nkkt. Emil unguwesifazane lonenhloko lemnyama. Futsi kulelikamelo, unembhedze logocwako lobovu nesitulo lesibovu.”

Watsi, “Wake wefika lapho yini, Mnaketfu Branham?”

Ngatsi, “Esikhashaneni nje lesendlulile.”

“Esikhashaneni lesendlulile na?” washo.

Ngatsi, “Yebo.”

“Ngani,” watsi, “Angizange sengikubone.”

⁴⁷ Ngatsi, “Cha. Bekungamoya.” Ngatsi, “Mnumz. Emil, uke wangiva ngicoca, uma ngikubhabhatisa, ngetintfo letenteka kimi. Loko kunga... Ngibona tintfo ingakenteki.”

⁴⁸ Watsi, “Yebo. Ngabe intfo lenjengaleyoyenteka kuwe, Mnaketfu Branham na?”

⁴⁹ Ngatsi, “Yebo. Futsi Mnumz. Emil, noma ngabe bekuYini lengitjelile, ayikaze ingitjele emanga. Luswane lwakho lutophiliswa uma ngifika lapho.”

⁵⁰ Futsi wamisa imoto, wawela etikwelisonvo lekushayela, watsi, “Nkulunkulu, ngehawukele. Ngibuyisele emuva, O Nkhosi.” Niyabona na? “Futsi ngiyaKwetsembisa, kuKuphilela, tonkhe tinsuku tekuphila kwami, uma Utophilisa imphilo yeluswane lwami.” Futsi lapho wanikela inhlitiyo yakhe kuKhristu. Sangena endlini, sonkhe sijabule ngalokwendlulele ngaye, umphemfumulo ubuyiselwa kuKhristu.

⁵¹ Ngesikhatsi si—ngesikhatsi siyongena endlini, nako kubekwe yonkhe intfo ngayo impela nje indlela lokwakungako, kuphela ngulowesifazane losamdzala lobekangekho lapho. Kujabula ngalokwecile, ngijabule ngalokwecile, ngatsi, “Nginiketenloluswane.” Naloluswane selucishe lungaphili nje. Niyabona na? Loko ku “phelela ne,” kwakukuphila sekuphumile eluswaneni. Kwakusongekela *lapha* nje, umphimbo walo lomncane. Futsi ngatsi, “Nginiketenloluswane.” Ngingalindzi umbono kutsi ugcialiseke.

⁵² Mnaketfu Vayle, uma lephedi beyifanele ibe *lapha*, ngeke ngasho lutfo leyophedi ite ibekwe lapho. Niyabona na? Kuyofanele kube ngayo nje indlela Lokwangikhombisa ngayo.

⁵³ Ngako ngatsi, “Nginiketenloluswane.” Nalobabe waletsa loluswane kimi, ngase ngiyalukhulekela, lwaya ngekuba lubi kakhulu. Ngako ngacabanga, “Manje lenye intfo...” Lwacishe lwalahlekelwa kuphemfumula kwalo, futsi badzingeka kutsi

balwe futsi balunyakatise, nako konkhe, bafake kuphefumula kulo. Ngacabanga, “Manje, kukhona lokuliphutsa.”

⁵⁴ Futsi kwenteka ngacabanga, “Uphi lowesifazane losamdzala na?” Lobekasengakabikhona noko.

⁵⁵ Ngako batsatsa luswane lwabo, balulalisa phansi. Bebabeka intfo phansi kwemphumulo yalo, yonkhe intfo, futsi lukhala. Lomake amemeta kakhulu, kwangatsi uphetfwelihabiya, nako konkhe. Kodvwa loluswane lwaseluphefumula nje—nje kancane.

⁵⁶ Ngacabanga, “Yebo-ke, ngebulima bami—bami, ngiwusebentise kabi umbono waNkulunkulu, ngoba angizange ngilindze kuWo, ngenca yekujabula ngalokwecile.”

⁵⁷ Ngaloku, ungabona, Mnaketfu Vayle, kutsi kungani ngilindza. Angikhatsali kutsi ngubani longitjelako. Ngiyakutsandza njengemnaketfu. Mnaketfu, ungacali wetame, ungitjele kutsi akubekhona lokutsite lengikwentako, uma ngi—uma ngiva kutsi ngi—nginentsandvo yaNkulunkulu. Uyabona na? Akunandzaba kutsi kubukeka kukuhle kanjani ngalelenye indlela, ngitolindzela Yena. Uyabona na? Futsi—futsi ngako nga—ngafundza sifundvo khona lapha, eminyakeni leminengi, leminengi, leyendlula; nekutsi ngente kona kanye nje Lakushoko, futsi ngingakwenti Aze asho kutsi sekulungele kutsi kwentiwe.

⁵⁸ Loluswane lwalulwa nekuphefumula. Manje, ngangingeke ngibatjele kutsi ngangenteni, kodvwa ngadzingeka kutsi ngilindze nje. Ngacabanga, “Mhlawumbe umusa utokweca ngetulu, futsi Angitsetsele.” Yebo-ke, ngahamba, ngahlala phansi.

⁵⁹ Balwa nemphilo yaloluswane kwaze kwasa. Lapho sekucala kusa, bebacabanga kutsi loluswane lwase lungashona noma ngamuphi umzuzu. Yebo-ke, ngahlala lapho. Futsi bebasolo bangibuta, “Mnaketfu Branham, sifanele sentenjani na?” Noma, “Mnaketfu Bill,” bebangibita kanjalo, “sifanele sentenjani na?”

⁶⁰ Ngatsi, “Angati.” Niyabona na? Ngahlala lapho, inhloko yami ibheke phansi, ngitsi, “Nkhosi, ngisite ungitsetsele.”

⁶¹ Yebo-ke, kwase kusa-ke. UMnaketfu Graham Snelling kwakufanele aye emsebentini. Ngako uMnumz. Emil bekatomsatsa, futsi ngangati kutsi kwakufanele ngisuke landlini.

⁶² Futsi, noko, uMnaketfu Graham bekafanele kuhlala lapho, ngoba unaletimhoshana, tinwele letiphotsene, njengoba nati. Bekafanele kuhlala kulombhedze logocwako. Ngako ngangihleti khona lapho uMnaketfu Graham bekafanele ahiale khona, kodvwa lowesifazane lomdzala bekangekho lapho. Futsi kute wesifazane lomdzala kuleyondzawo. Ngako nighleti lapho. Futsi ngako uMnumz. Emil wagcoka libhantji lakhe.

⁶³ Ngase ngiyati-ke, uma uMnaketfu Graham sekahambile, kulukhuni kusho kutsi uyoze abuye nini. Niyabona na? Ngase ngiyati-ke, ngisho noma lowesifazane efika, khona-ke uMnaketfu Graham ngeke abe lapho. Ngako niyabona kutsi hlobo luni lwesimo lengangikuso.

⁶⁴ Futsi ngako uMnumz. Emil watsi, “Mnaketfu Branham, uyafuna kuhamba?” Noma, “Mnaketfu Bill, ufunu kuya ekhaya? Ufunu ngikuyise entasi ekhaya?”

⁶⁵ Ngatsi, “Cha, mnunzane. Ngitolindza nje, uma kungakukhatsati.” Ngangikutondza kuhlala lapho endlini, loluswane nje nalomake, nami nje, ngoba bebabantfu labasebancane. Bona, lowesilisa, bekaneminyaka lecishe ibe ngemashumi lamabili nesihlanu budzala, ngiyetsema. Futsi ngangicishe ngibe kuleyominyaka lefanako. Ngatsi, “Cha. Ngito nje—ngitolindza nje, uma kungakukhatsati.”

Watsi, “Kulungile, mnaketfu, Mnaketfu Bill.”

⁶⁶ Futsi ngako lomake bekahamba ehla enyuka nesiyo, kwangatsi uphetfwe lihabiya, futsi etama ku...akhala nayo yonkhe intfo, niyati. Naloluswane lusesimeni lesibi kakhulu nje. Niyabona na? Kubukeka nje, nomangamuphi umzuzu, kutsi nje kubamba umphefumulo walo, kanjalo, luhamba...[UMnaketfu Branham wenta imisindvo lemibili lephansi yekuhufutela—Umhl.] Nguloko kuphela, kuphefumula kwalo, lokwakukulo. Futsi akunalutfo...Bebangenayo ne-phenisilini netintfo, ngaletotinsuku, niyabona. Ngako bebavele nje—bebavele nje babeke emaplasta etikwabo, netintfo letinjalo. Kodvwa loluswane loluncane lwaselube nako tinsuku letinengana. Futsi lwaseluhambile, niyabona, noma lwase luhamba.

⁶⁷ Futsi, ke, nga—ngahlala phansi lapho. Ngacabanga, “Hhe, uma Graham ahamba...” Graham wagcoka libhantji lakhe, wase ucala kuphuma ngemnyango.

⁶⁸ Wase utsi kumkakhe, watsi, “Manje, sitobuya, emzuzwini nje.”

⁶⁹ Ngacabanga, “O Nkulunkulu, manje-ke ngitofanele ngihlale lapha lusuku lonkhe, futsi mhlawumbe busuku bonkhe, futsi, niyabona, ngilindze lowombono. Yini lengingayenta?”

⁷⁰ Futsi ngalunguta ngephandle ngeliftastelo. Futsi lobeketa agega indlu, kuta gogo weluswane ekhatsi lapho. Futsi, yebo-ke, ngafundza kamuva, kwakungugogo. Futsi bekafake tibuko. Ngacabanga, “Ngiko ke loku, Nkhosi, uma—uma Graham angaphumi nje emnyango.” Ngako, uhlala njalo efika ngemnyango longembili. Kodvwa, ngandlela-tsite, abati ngisho nekwati, kute kube ngumanje, kodvwa waya emnyango longemuva, wangena ekhishini. Futsi wahamba wangena ekhishini, lencane, indlu lendzala. Futsi wefika emnyango, indvodzakati yakhe yagijimela lapho yefike yamcabuza,

ngoba kwakuyindvodzakati yamake, niyati, yamcabuza. Futsi uMnaketfu Graham . . .

Wase utsi, “Ngabe loluswane seluncono yini?”

⁷¹ Watsi, “Make, luyafa.” Yase icala kukhala kakhulu kanjalo, namake wayo wakhala.

⁷² Ngase ngiyacabanga, “Uma loku kutosebenta nje, nyalo, uma Graham angaphumi.”

⁷³ Ngase ngiyasukuma. Futsi angishongo lutfo, niyabona, kulindza nje. NeMnaketfu Graham watsi kuhambahamba. Ngase ngisukumile kute ahlale phansi. Futsi yena . . . Futsi leso kwakungulesinye sesihlobo sakhe, niyabona, ngako wavele nje wacala kukhala, naye, wase uhlala phansi embhedzeni logocwako lapho bekafanele ngabe uhleti khona.

⁷⁴ Ngacabanga, “Manje, uma leso salukati sitovele nje site ngalapha bese sihlala kulesitulo lesibovu!” Ngase ngibuyela emnyango lapho uMnumz. Emil bekeme khona, embetse lijazi lakhe, futsi sekalungela kuphuma. Simo selitulu sibandza sibili, kunemakhata esiphepho selichwa. Futsi ngacabanga . . . Nalesalukati sahlala phansi kulesitulo lesi.

⁷⁵ NaGraham wahlala phansi, wase ushobelisa inhloko yakhe phansi. Nalomake weluswane, wabeka sandla sakhe etulu emnyango, wase ucala kulila. Ngawo impela nje lombono! Nalesalukati sahlala phansi. Futsi esikhundleni sekutsi kube tinyembeti, ngako konkhe, etibukweni taso, sivela emakhateni, bekatente taba nenkhungu. Sase sifaka sandla eputumendeni laso lelincane sase sikhapha liduku lelincane, ne, noma joyisaka lomncane, sase sicala kwesula letibuko. [UMnaketfu Branham ushaya umunwe wakhe kanye—Umhl.] Mnaketfu, loko kwasekungiko-ke.

⁷⁶ Ngatsi kuMnumz. Emil. Ngatsi, “Mnumz. Emil, usangetsema njengenceku yaKhristu na?”

Watsi, “Impela ngiyawetsema, Mnaketfu Branham.”

⁷⁷ Ngatsi, “Sengingakutjela manje. Ngisuke ngakhulumga phambi kwalombono, esikhashaneni lesendlulile, kungako kungakenteki. Uma usangetsema, hamba ungiletele luswane lwakho.” O, hhe! Ngiyabona kutsi kwase kukahle, ngalesosikhatsi, niyabona. “Hamba, ungiletele loluswane lwakho.”

⁷⁸ Watsi, “Ngitokwenta nomayini longitjela kutsi ngiyente, Mnaketfu Bill. Beningeke ngesaba kulucukula.” Ngoba, bebalucukula, lwavele lwahamba nje, kuphefumula kwaphuma nya kulo. Waluphakamisa loluswane loluncane waluletsa kimi. Weluleka wase ulubeka emikhonweni yakhe, waluphakamisa waluletsa kimi, wase uma lapho.

⁷⁹ Ngabeka sandla sami etikwalo, ngatsi, “Nkhosi, tsetselela bulima benceku yaKho. Niyabona na? Ngikhulume ngaphambili

kwembono waKho. Kodvwa manje akwateke kutsi Wena unguNkulunkulu wemazulu nemhlaba.”

⁸⁰ Akubanga ngetulu, kwekuba sengishito loko, loluswane loluncane lwasho lunkonkoshela uyise ngemikhono yalo, lucala kumemeta kakhulu futsi lukhala, lutsi, “Babe, ngitiva sengiphilile manje.” Niyabona na?

⁸¹ Ngatsi, “Mnumz. Emil, luyekele kanjalo loluswane loluncane. Kutoba tinsuku letintsatfu ngaphambi kwekutsi kuluyekele, ngoba lwanyatsela katsatfu, luchacheka.”

⁸² Ngaya ekhaya, futsi ngakucoca ebandleni lami. Ngatsi, “Ngitobuyela.” Loko kwakungeMsombuluko. Ngatsi, “NgaLesitsatfu ebusuku, ngaphambi kwelibandla, ngenyukela lapho.” Bebabantfu labahluphekako, futsi sabentela ibhaskidi yegrosa, kuba siyyise kubo. Ngako ngatsi, “Ngifuna nihambe nonkhe, futsi uma ngiya laphaya. Futsi nibutsane ekhaya. Futsi uma ngifikasi kuleyondzawo, kuya lapho leyondlu ikhona, nibukisise nibone kutsi loloswane loluncane aluti yini luhamba phansi endlini, lunemadzevu lamancane lentiwe *lapha*, lapho belunatsa khona lubisi loluneshokholethi noma lokutsite. Niyabona na? Bese lubeka tandla talo kutami, bese lusho lamagama, ‘Mnaketfu Bill, sengiphila saka.’ Loluswane loluncane lunemninyaka lemitsatfu budzala. Nibukisise futsi nibone kutsi akwenteki yini.”

⁸³ Umkami manje, Meda, kusekhashane kakhulu kutsi sishade, ngako bekakulesicuku. Neloli legcwele yahamba base batibeka bona ngasendlini, niyabona, kungibona ngesikhatsi ngishayela ngenyuka ngeloli lendzala yeNkapane yeteMisebenti yeSive lengangikadze nginayo ekhaya ngalobobusuku. Ngangite imoto lengeyami. Igcwele litiyela ngemuva, netintfo, niyati, lapho ngangikadze ngiludvonsa ngalolosuku, futsi ngilungisa tintfo. Ngashayela ngenyuka ngaya ngembili, ngema. Ngenyukela kuvulande lomncane; nganconcotsa emnyango. Futsi bebangenabo bokhaphethi kulesiyilo lesidzadlana. Nalomake weta ahamba phansi endlini, watsi, “Ngani, nguMnaketfu Bill,” kanjalo. Nalabantfu bebabuka emafastelweni, ngalesosikhatsi, kubona kutsi kwakutokwentekani.

⁸⁴ Futsi ekoneni, lodlalako, kwakungulomfanyana, ngelusuku lwesitsatfu. Ngema, ngangasho lutfo. Futsi eta, atihambahambela phansi endlini, wabeka tandla takhe letincane kutami. Ane...Bakakadze anatsa lubisi loluneshokholethi, emadzevu akhe lamancane, kwangatsi ngiwo, khona *laphaya*, entiwe lubisi loluneshokholethi. Waphakamisa tandla takhe watibeka kutami, watsi, “Mnaketfu Bill, sengiphile saka.” Huh!

⁸⁵ Ngalobo busuku, ebandleni, ngakucoca. Ngatsi, “Kunentfombatane lekhubatekile, ndzawanatsite, ledzingile.”

Ngatsi, "Bandla, angati kutsi letintfo leti tichaza kutsini. Ngingeke senginitjele."

⁸⁶ Futsi—futsi ngako ngangisebenta emnyango weteMisebenti yeSive. Futsi ngiyakhumbula ngalelinye lilanga, cishe evikini emvakwaloko, ngacala kusuka endlini, ngiphuma. UMnumz. Herb Scott, uhlala lapha edolobheni njengamanje, bekangubasi wami. Futsi watsi... Ngacala kwehla. Watsi, "Billy?"

Ngatsi, "Ya."

Watsi, "Ungakahambi, nginencwadzi yakho lapha."

Ngatsi, "Kulungile, Herbie. Ngitoyitsatsa emzuzwini."

⁸⁷ Futsi—futsi ngako ngaya ngale kuyotsatsa lomunye umsebenti wami, lengangiwuhlol. Ngako ngaya ngale kuyokwenta lomunye umsebenti wami. Futsi ngesikhatsi sengi—sengikwentile, ngakhumbula leyoncwadzi. Ngahamba ngase ngiyayitsatsa, ngayivula. Futsi yayitsi, "Mnumz. Branham lotsandzekako," niyabona, yatsi, "ligama lami nginguNail. NginguNkkt. Harold Nail. Sihlala endzaweni letsiba yiNingizimu Boston." Futsi watsi, "SiyiMethodisti, ngekukholwa. Futsi kwenteka ngafundza incwadzi lencane lowayibhala, letsiba Jesu Khristu LonguYe Itolo, Namuhla, NaPhakadze, incwajana lencane. Futsi sasinemhlangano wemkhuleko endlini yetfu, ngalolobunye busuku. Futsi civile ngawe unemphumelelo, ukhulekela labagulako." Futsi watsi, "Nginendvodzakati lehlaselekile, ineminyaka lelishumi nesihlanu budzala," watsi, "lelele embhedzeni wekuhlaselwa. Futsi ngandlela-tsite, nje angikwati kukususa engcondvweni yami, kutsi ngifanele ngitfole wena ute utokhulekela lentfombatane. Ungasita ukwente na? Wakho ngeliciniso, Nkkt. Harold Nail. ENingizimu Boston, e-Indiana."

Ngatsi, "Niyati, nguleyo lentfombatane. Ngiyo ke leyo."

⁸⁸ Ngaya ekhaya, ngatjela make wami, ngabatjela ngako. Ngatsi, "Nguleyo—nguleyontfombatane." Kwase kutsi-ke ngalobo busuku, ebandleni, ngatsi ebandleni. Ngatsi, "Nai leyo—leyo—leyo—leyondzawo." Ngatsi, "Ukhona lowatiko kutsi iNingizimu Boston ikuphi na?"

⁸⁹ Futsi uMnaketfu George Wright, nonkhe nimejwayele, watsi, "Mnaketfu Branham, kuse... Ngicabanga kutsi kusentasi eNingizimu."

⁹⁰ Ngako ngelusuku lolulandzelako, bangani bami lababili, nemkami, longuye manje, nendvodza nemkayo bavela eTexas. Bona, ligama labo kwakunguBrace, Ad Brace. Uhlala entasi lapha manje, ekhatsi entasi kwaseMilltown, umlimi. Bekangumfui wetinkhommo ngaphandle eNshonalanga. Futsi bekesesukile lapha kutsi asondzele esontfweni. Futsi ngangikadze ngikhulekele umkakhe, futsi bekakadze aphiliswe esimeni sekuba nesifuba sengati. Futsi ngako bekafuna kubona

loku kwenteka. Ngatsi, "Hamba nami, bese uyabona kutsi akwenteki yini ngalendlela nje." Ngako lodzadze bekangakaze awubone umbono, Nkkt.—Nkkt. Brace. Ngako umkami wahamba nami. NeMnaketfu Jim Wisehart, lilunga lelidzala, niyakhumbula, libandla lapho, lidikhoni lelidzala, bekafuna kukubona. Nganginalencane nje, imoto lendzala ngalesosikhatsi lelingene bantfu lababili, futsi ngabalakanyisa bonkhe ekhatsi lapho.

⁹¹ Futsi sehlela ngentasi kweNew Albany. Futsi ngatfola lesayini, futsi ngefika ngatfola kutsi, kwakungesiyo iNingizimu Boston. Kwakuyi New Boston. Ngako-ke angatanga kutsi ngifanele ngiye kuphi, ngako ngiyabuya ngenyukela eJeffersonville ngase ngibuta lomunye. Nalolomunye waya eposini, batsi, "INingizimu Boston isenhla ngetulu kwaseHenryville."

⁹² Ngako nge—ngenyukela eHenryville, futsi ngabuta lapho. Futsi batsi, "Jika ngalomgwaco. Kwakungemakhilomitha lacishe abe mashumi lamabili nakune, ngemuva etikwalamagcunya *lapha*, utfola indzawo lencane. Utofanele ucaphele, utoyigeja," watsi, "ngoba sitolo sinye nje lesincane. Nalesitolo sineliposi, yonkhe lenye intfo, kuso. INingizimu Boston, ngale kulamagcunya." Kukhona ema ekha latinkhulungwane letilishumi nesikhombisa talawo magcunya ekhatsi lapho, niyabona. Futsi loku kungale emvakwayo, emagcumeni lapho.

⁹³ Ngako sachubeka, sigibela. Futsi khona masinyane, ngeva lokungakejwayeleki sibili. Emvakwekuba sengishayele, emakhilomitha lasiphohlongo noma layimfica, ngeva lokungakejwayeleki impela. Ngatsi, "Angati."

Batsi, "Yini indzaba?"

⁹⁴ Ngatsi, "Ngikholwa kutsi—kutsi Lowo lokhulumu nami, ufunu kuhulumu nami, ngako ngitoyishiya lemoto."

⁹⁵ Ngako ngaphuma emotweni. Nalabesifazane bahleti ematsangeni ebefazane, niyati, nako konkhe, leyomoto lendzala lelingene bantfu lababili. Futsi ngaphuma emotweni, futsi ngajikela emvakwemoto. Ngase ngikhotsamisa inhloko yami phansi, ngabeka lunyawo lwami kubhampa, ngemuva kwemoto. Ngase ngitsi, "Babe loseZulwini, Ufunu kuyatisa ini inceku yaKho na?" Futsi ngakhuleka. Akwentekanga lutfo. Ngalindza imizuzu lembalwa. Ngase ngiyacabanga, "Yebo-ke, U..." Ngalokuvamile lapho kunesicuku lesinjalo, ngifanele ngibe ngedvwa. Futsi ngako ngalindza imizuzu lembalwa.

⁹⁶ Kwenteka ngakhangeka, ngibuka laphaya. Kwenteka ngacabanga, "Yebo-ke, awubuke lapha, nali lelosontfo lelidzala lisentasi lapha." Futsi uma uke ube se... YiBunker Hill Church. Ngabuka ngalapha kulolunye luuLangotsi, iBunker

Hill Christian Church, futsi kwakukhona ematje emathuna endzaweni yemathuna, khona impela embikwelisontfo.

⁹⁷ Futsi ngaya lapho. Ngatsi, “Manje nonkhe ninato letotincwadzi.” Angikaze ngibe kulelolive ngaphambili, emphilwени yami. Angikaze ngibe ngetulu lapho, nomaphi, emphilwени yami. Futsi ngatsi, “Tsatsani lawomagama netinombolo bese nita lapha, nibone kutsi akusilo yini lelo lelifanako kulelitje lelithuna.” Futsi lalilapho, impela nje. Ngatsi, “Nguloko-ke. Sisemgwacweni longiwo manje.” Ngatsi, “Leyo bekuyiNgelosi yeNkhosi.” Niyabona, ngendlula ngakuwo ngco, futsi ngingawati. Ngako, o, Iphelele.

⁹⁸ Futsi ngako sagibela sachubeka sachubeka. Ngalokucondzile nje ngadibana nendvodza, futsi ngatsi, “Ungangitjela kutsi iNingizimu Boston ikuphi, mnumzane?”

⁹⁹ Yatsi, “Ncengacenga uye ngesekudla nesencele,” niyati, kanjalo kanjalo. Futsi sachubeka nje sihamba.

¹⁰⁰ Ngako emvakwesikhashana, singena, ngacaphela, ngingena endzaweni lencane. Futsi yayinesigodzi lesincane, lokufana naso. Futsi nga—ngabuka. Ngatsi, “Ngiyo. Ngiyo, khona lapho.” Ngatsi, “Naso lapho i... Lapho, naso lesositolo lesimtfubi ngaphambili.” Ngatsi, “Manje, bukisisani. Indvodza itophuma laphaya, igcoke i-ovaloli leluhlata-sasibhakabhaka, ikhoro lemhophe... noma likepisi leliyikhodro lelimtfubi, inemadzevu lamhophe, futsi ingitjele kutsi angije kuphi. Uma kungenjalo, ngingulomkhulu umcoci wetinganekwane.”

¹⁰¹ Futsi ngako bonkhe bebalindzile. Nga—ngase ngishayela ngyenyuka, embikwalendzawo. Futsi nje kwatsi ngisashayela ngyenyuka, ngaphambili, kwavele kwaphuma indvodza legcoke isudu ye-ovaloli leluhlata-sasibhakabhaka, nelikepisi lekhodro lelimtfubi, nemadzevu lamhophe. NaNkk. Brace waculeka emotweni, akubona kufezeka, kanjalo.

Ngatsi, “Mnumzane, utongitjela kutsi Harold Nail ukuphi.”

Yatsi, “Yebo, mnumzane.” Yatsi, “Ngabe wena uchamuke eNingizimu na?”

Ngatsi, “Yebo, mnumzane.”

¹⁰² Yatsi, “Sewukwendlulile. Cishe likhilomitha entasi nemgwaco, uyajika, umgwaco wekucala ngesencele. Wenyuke, bese utfola inyang lenkhulu lebovu, bese uyajika ungene kuleyonyango lebovu.” Yatsi, “Yindlu yesibili ngesekudla sakho, lapho ujika wenyuka ngalowomgwaco longatsi ngumgwacana lokakwe tindlu.”

Ngatsi, “Yebo, mnumzane.”

Yatsi, “Ngani?”

Ngatsi, “Unendvodzakati lephatsekile. Akanayo na?”

Yatsi, “Yebo, mnumzane. Unayo.”

¹⁰³ Ngatsi, “INkhosi itoyiphilisa.” Nalendvodza lendzala yacala kukhala. Niyabona na? Yayingati lutfo. Futsi ngako yayibaliwe kulombono. Yayingati kutsi kwakwentekani.

¹⁰⁴ Ngajika. Samtfola Nkkt. Nail asatsite kuvuseleleka futsi. Futsi senyukela lapho, sahamba sakphukela ebaleni. Saphuma emotweni, sacala kungena. Sacala kwenyuka endzaweni leya e...niyati, kuya endzaweni lapho kwakungu khona. Nentfombi lesidudla ita emnyango. Ngatsi, “Nayo ke.” Niyabona na?

Futsi ngako yatsi, “Sanibonani?”

Ngase ngitsi, “Sawubona?” Ngatsi, “Ngi—nginguMnaketfu Bill.”

¹⁰⁵ “O,” yatsi, “Ngi—ngi—ngicabangile kutsi bewunguye.” Yatsi, “Uyitfolile incwadzi yami?”

Ngatsi, “Yebo, memu, ngiyitfolile.”

Yatsi, “NginguNkkt. Harold Nail.”

¹⁰⁶ Ngatsi, “Yebo-ke, ngiyajabula kukwati, Nkkt. Nail. Futsi leli nje licembu lelincane lengihamba nalo, kutsi ngikhulekele lentfombatane yakho.”

Watsi, “Yebo.”

Ngatsi, “Ilungiselela kuphiliswa.”

¹⁰⁷ Watsi, “Yini?” Netindzebe takhe tacala kuvevetela. Wacala kukhala.

¹⁰⁸ Ngatsi, “Yebo, memu.” Futsi a—angati; angizange ngimmele lowesifazane.

¹⁰⁹ Ngachubeka ngco ngehla ngehhola, nelicembu lami lingilandzela. Ngesikhatsi ngivula umnyango ngesekudla sehhola, lelikhulu, lelidzala, likhaya lasemaphandleni, ngavula umnyango, kwakukhona liphephandzaba lelimtfubi—...noma emaphepha lamtfubi elubondzeni, titfombe letibovu; isayini, “Nkulunkulu busisa likhaya letfu;” umbhedze lomdzala wephosta; sitofu setinkhuni sihleti ngesencele sami. Futsi nango ubhedze webantfwana lomncane uhleti lapho, naalentfombatane lebukeka isamfana ilele kuwo.

¹¹⁰ Manje kukhona lokwentekako. Ngangisenhla ekoneni lalelikamelo, ngibukisia umtimba wami uya kulo wobhedze. Ngase ngibeka tandla tami esiswini sayo, ngayo nje lendlela iNkhosi leyasho ngayo. Futsi sengikwentile loko, ngesikhatsi Nkkt. Nail angena ekamelweni futsi wabona loko, nanguya ehla phansi endlini, futsi, waculeka. Uluhlobo lwemuntfu lobutsakatsaka, futsi waculeka phansi esiyilweni, futsi. NeMnaketfu Nail beketama kusebentana naye. NeMnaketfu Jim lomdzala eme lapho, atsi, “Ayibusiswe iNkhosi,” ahlanganise tandla takhe, uma nonkhe benati kutsi bekenta kanjani. Futsi ngako-ke ngakubuka loko, futsi ngakubona loko.

¹¹¹ Ngase ngibeka tandla tami etikwayo, noma etikwesisu sayo, *kanjena*. Ngatsi, “Nkhosi, ngenta loku ngemyalo waloko, lengicabanga kutsi, nguNkulunkulu angitjela kutsi ngikwente.” Futsi cishe ngalesosikhatsi, yacala kukhala, futsi yagcuma yaya etulu.

¹¹² Futsi bavele nje basukumisa Nkk. Nail ngetinyawo takhe. Bekasaphapheme esihlwatsini sekuculeka kwakhe.

¹¹³ Futsi ngesikhatsi lentfombatane igcuma isuka embhedzeni, nako kuphakama umlente wayo wephijama ngasemlenteni wangesekudla, ngayo kanye nje indlela lokwabonakala ngayo embonweni. Futsi kwakukhona lelodvolo leliyindingilizi lentfombatane, esikhundleni semfana.

¹¹⁴ Nango ashona phansi Nkkt. Nail, futsi. Niyabona na? Waculeka. Loko kwase kukwesitsatfu aculeka.

¹¹⁵ Naleyontfombatane yaphuma lapho, kulelokamelo. Futsi yaya ekamelweni layo lekugcokela, ikhala, yase yembatta ingubo yayo leyi-kimono, yabuya seyihamba, ikama tinwele tayo. Neyayo...naleyo crip-...Futsi sandla sayo—sayo sinye sasikhuatekile, naso, ngesekudla. Ikama tinwele tayo ngalesosandla lesikhuatekile.

¹¹⁶ Ishadile, inesicuku sebantfwana. Ligama layo, angisalati ligama layo kutsi ngubani manje. Kodvwa yakaNail, nomangubani anganitjela, Harold Nail.

¹¹⁷ Naleyomibono iliciniso. [Akucoshwanga etheyiphini—Umhl.] Beningakubeka loko bese ngiyanitsatsa nginiyise kubantu labangenta umcukutfu wemabhuku etintfo letinjengaleto leyentekile. Manje, liciniso lelo, Mnaketfu Vayle.

¹¹⁸ Ngiyokwehluleka mine; ngingumuntfu. Ngisehluleki, kwekucala nje, nembambeli losihlupheki lesikhulu senceku yaKhristu.

[Akucoshwanga etheyiphini—Umhl.]

¹¹⁹ [UMnaketfu Vayle utsi, “Pela Merrell?”—Umhl.] M-e-r-re, dabuli l. [“Bengicabanga kutsi bekungilo phansi lapho. Ya.”] Ngabe ngulawo kuphela lelikhona, lawa manje na? [“Nail kwakungu N-e-i-l?”] N-a-i-l. [“Brace, B-r-a-c-e?”] B-r-a-c-e, Ad, Ad Brace. [“Manje ngicabanga kutsi sengiwatfole onkhe. Kancane nje. Graham Shelling?”] Graham, G-r-a-h-a-m. [“Loyo ngu ‘n’ lapho.”] S-n-e, dabuli l, i-n-g. [“O, Snelling. Manje sesikutfolile.”]



IMIBONO YA WILLIAM BRANHAM SSW60-0930
(Visions Of William Branham)

LoMlayeto ngeMnaketfu William Marrion Branham, kwekucala wetfulwa ngesiNgisi ngaLesihlanu ekuseni, ngenyanga yeNyoni 30, 1960, eCampaign Office eJeffersonville, eIndiana, eU.S.A., utsatselwe ekucopheni kwetheyiphu lenamazibuthe futsi wakhicitwa ungakafinyetwa ngesiNgisi. Loku kuhunyushwa neSiSwati kwakhicitwa kwakhishwa yiVoice Of God Recordings.

SWATI

©2021 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Inotsisi yelilungelo lemtsetfo

Onkhe emalungelo agodliwe. Lencwadzi ingaprintwa ngeprinta yasekhaya yentelwe kutsi umuntfu atisebentisele yena noma kutsi iniketwe labanye, mahhala, njengelithulusi lekusabalalisa liVangeli laJesu Khristu. Lencwadzi akukamele itsengiswe, iphindze ikhicitwe tibetinengi, iposwe kuwebsayithi, igcinwe ngeluhlelo lwekutsi iphindze itfolakale, ihunyushelwe kuletinye tilwimi, noma isetjentiselwe kuticelela timali ngaphandle kwemvumo lebhaliwe lecondzile ye Voice Of God Recordings®.

Mayelana nelwati lolwenetiwe noma lwalwenye impahla lekhona, sita uchumane ne:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org